

**■ COLUMNA**

# Viriveri salidaivel u perina cun Leo

(Glossina da mesemna, ils 31 d'october)

DAD AITA DERMONT-STUPAN

**S**co fan (per betg dir fanaticra) dals cudeschs e texts da Leo Tuor ma sun jau adina grittentada che nossas opiniuns eran per il solit differentas. Oz, suenter avoir legì sia ultima glossina, sun jau cuntenta. Finalmain essan nus dal medem avis: Cultura na duess betg esser pura. Cultura è adina in conglomerat. In viriveri salidaivel. E lingua è er cultura.

**P**recis perquai pens jau – er senza leger Joyce u Beuys – ch'i na fetschia er a noss rumantsch betg donn da maschadar in pau: far p. ex. or da «jeu»ed «eu» «jau», surpigliar in u l'auter pled d'in auter idiom u laschar



ir magari in pled plaunet en envlidanza. In viriveri salidaivel!

**M**a dischplaschaivla-main n'han ils idiomists betg salidà il «Viriveri». Anzi, els han fatg responsabel il pover Viriveri per la mort dal rumantsch. In Viriveri na dastga betg exister! Giu cun el! Da Müstair fin Mustér.

**P**ersuenter po ussa cuntunt la magistraglia rumantscha far la crusch tar mintga med d'instrucziun e gavischar en tge stget e pur idiom che quel dastga esser. («Tants meds d'instrucziun sco ils ultims ons n'èn anc mai vegnids stampads», sa lauda M. Jäger).

**E**plinavant, a mintga Rumantsch si'atgna gasetta. Uschia èsi urden e Viriveris n'han betg schanza.

**M**irveglias hai jau sche noss vischins tschellauers vegnan proxima stad a festivar il 100avel anniversari da la Lia Rumantscha a Zuoz u sche quai dat er puspè be in Viriveri.